

Mikeas

Hopi hende, ora nan ta kòrda e buki di Mikeas, ta pensa mes ora di su teksto mihó konosí. Mikeas 6:8 ta bisa “El a bisabo, O hende, loke ta bon; i kiko SEÑOR ta eksigí di bo, si no ta pa hasi hustisia, pa stima misericòrdia, i pa kana umildemente ku bo Dios?” Un teksto bunita sigur!

Awendia hopi hende ke sa ku religion ta un kredo elokuyente, un edifisio bunita i ritonan impreshonante. Ma esei ta religion bashí. Segun Mikeas 6:8, Dios ta eksigí hustisia (santidat, rektitut i étika den tur parti di bida), misericòrdia (konsiderashon pa otronan) i umildat pa ku Dios. Señor ke pa nos tin un relashon personal ku n’E i demonstrá esaki den nos bidanan diario.

Ma no ta korekto pa tuma Mikeas 6:8 komo un deklarashon universal pa loke hende mester hasi pa agradá Dios. E konteksto di e teksto aki ta indiká ku Mikeas tabata papia i skirbi pa hende ku mester a kambia nan komportashon pa drecha nan relashon ku Dios, pues repentí. Ma ningun hende ta salvá pasobra el a “drecha su bida”. Salbashon ta solamente a base di Dios Su gracia pa medio di fe (Efesionan 2:8-10).

Ma tin muchu mas tokante e buki di Mikeas ku nos ke mira.

I. OUTOR DI E BUKI

Mikeas (MI-KA-YAHU na idioma hebreo) ta nifiká “Ken ta manera Jehová?” E nòmbernan Mikeas i Miguel (“Ken ta manera Dios?”) ta similar. Kisas Mikeas ta referí na su mes nòmber na un forma indirekt den 7:18 “Ken ta un Dios manera Bo...?” Vários persona den Beibel tabata yama Mikeas. Tambe tin un profeta ku ta yama Mikaias (1 Reinan 22; 2 Kronikanan 18). Ma e tampoko tabata e mésun profeta. No bruha den e nòmbernan.

E profeta Mikeas a biba na Juda i a profetisá prinsipalmente na e hendenan di e pais di Juda. Ma e no tabata un habitante di Jerusalèm. El a biba na Moreset (1:1) den e seritonan 32 kilometer sùit-wèst di Jerusalèm. E pueblito aki tabata lokalísá serka frontera entre Juda i Filistia. Moreset-gat (1:14) tabata un otro nòmber pa e pueblo. Moreset-gat ta nifiká “poseshon di Gad”, pusíbelmente pasobra Moreset a pertenesé un tempu na Gad, un suidat di e filisteonan.

Moreset tabata lokalísá serka e kaminda prinsipal di Egipto pa Jerusalèm, loke tambe tabata e kaminda internashonal for di Egipto pa Asia i Oropa. Karavananan i ehersitonan di diferente pais lo a pasa riba e kaminda. Kisas Mikeas a mira for di porta di su kas ehersito di Asiria pasa pa konkistá Egipto i regresá pa konkistá Israel i a pon’é preokupá pa su mes nashon.

Nos a mira kaba ku Amos tabata un kunukero di Tekoa, unda e tera no trabata masha fruktifero. En kontraste, e kunukunan rònt di Moreset tabata fruktifero. E tabata un pueblo chikitu di kunukeronan i kampesinonan.

Mikeas ta duna ningun informashon personal. Ma e lo tabata un kampesino. E echu ku tata di Mikeas no ta mensioná, talbes por indiká ku Mikeas no a bin di un famia prominente.

Mikeas a profetisá durante reinadonan di Jotam (750-731 B.C.), Akaz (735-715 B.C.) i Ezekias (715-686 B.C.). Nos sa di dos otro profeta ku a profetisá durante e era aki. Oseas (754-714 B.C.) a profetisá pa Israel mientras Isaias (739-692 B.C.) su ministerio tabata dirigí pa ku Juda. Talbes Isaias i Mikeas tabata kolega i a enkurashá otro den nan ministerio. Isaias a

kuminsá profetisá durante reinado di Uzias (Isaias 1:1), e rei promé ku Jotam. Pesei ta probabel ku Mikeas tabata mas hóben ku Isaias. Ta parse tambe ku Isaias a profetisá mas tantu na e lídernan den stat di Jerusalèm mientras Mikeas tabata profeta pa ku e puebel pafó di e kapital.

Rei Jotam a sigui Dios. Ma ta parse ku e hendenan di Juda no sigui su ehèmpèl. Ora el a muri, Akaz, su yu, bira rei. Akaz a desvia leu fo'i Dios i a re-introdusí idolatria na Juda huntu ku tur e maldat ku esei a enserá. El a rechasá e altar di Dios i a supstituí un altar pagano. Durante su reinado, el a forma un aliansa ku Asiria pa nan ataká su enemigunan, Israel i Siria. E aliansa ku Asiria kasi a destruí Juda.

E siguiente rei, Ezekias, a sigui Dios. Ma ta parse ku e poblashon di Juda a adorá Dios, ma no di kurason. Nan a sigui den nan pikánan. Mikeas i Isaias a profetisá kontra nan.

Desde reinado di Akaz, Juda a biba ku temor di invashon di Asiria. Sin duda tabata durante ministerio di Mikeas ku Asiria a destrui Israel.

Ta parse ku Mikeas su ministerio a hasi bastante un impakto riba su pueblo. Mas ku shen aña despues ku Mikeas a skirbi su buki, e ansianonan di Juda a sita Mikeas (Jeremias 26:17-19). E echu ei ta duna impreshon ku Mikeas su ministerio a laga un impreshon duradero. Tambe e teksto aki ta laga sa ku durante bida di Mikeas, rei Ezekias i lídernan di Juda a konosé i respetá Mikeas i ku nan a konsiderá su profesia komo palabra di Dios.

II. LEKTORNAN DI E BUKI

Mikeas a profetisá espesialmente pa ku Juda. Den e buki, Jerusalèm i Sion ta mensioná 17 biaha. Ma ta e buki tambe ta kontené profesionan tokante Israel i klaramente ta dirigí pa e nashon aki (1:1,5-7,13,14,15; 3:1,8,9; 5:1,2,3; 6:2).

III. FECHA DI E BUKI

Mikeas 1:1 ta mensioná tres diferente rei, lagando nos sa ku su ministerio por a dura for di 734 te 698 B.C. Kisas su ministerio a dura 40 aña òf mas. Durante e tempu ei Mikeas lo a skirbi su buki. Tin algun indikashon ki fecha e por a skirbi e buki.

E kondishonnan ku Mikeas ta deskribí den su buki ta kuadra mas ku e era ku e malbado Akaz a reina (736-728 B.C.) pasobra Ezekias a introdusí reformashonnan formal. Pusíbelmente e por a skirbi e buki mas den komienso di reinado di Ezekias, ora el a reina huntu ku Akaz (728-725 B.C.). E buki ta duna impreshon ku el a wòrdu skirbí despues ku Asiria a konkistá Damasko (734-732 B.C.). Ma Mikeas 1:5-7 i kapítulo 6 ta indiká bon kla ku Asiria no a konkistá i destruí Samaria ainda i deportá pueblo di Israel (722 B.C.). Pues, e probabel fecha ku Mikeas a skirbi e buki lo mester ta entre 732 i 722 B.C.

IV. PROPOSITO I MENSAHE DI E BUKI

Por bisa ku Mikeas tin tres proposito den su buki. Pa di promé, Mikeas ke muestra riba e pikánan e pueblo di Dios, tantu e reino di nort komo esun di sùit. Di bèrdad, Mikeas ta un di e poko profetanan ku a indiká su proposito: “..ami ta yen di poder—ku e Spiritu di SEÑOR—i ku hustisia i kurashon pa hasi Jakòb konosé su echo di rebeldia i Israel su piká” (3:8). El a kondená diferente piká di e tempu ei: idoletria (1:7; 6:16); inmoralidat (1:7); rikunan a oprimí pobernan (2:1-2; 3:1-3); religion guiá pa profetanan falsu (2:6,11), korúpto (3:5-7) i golos pa plaka (3:11); hòrta di turistanan (2:8); saka muhénan (biuda?) for di nan kas (2:9); gobernantenan inhustu, korúpto i violento (3:1-3,9-11; 7:3); violensia (3:10; 6:12; 7:2); talbes asta sakrifiso humano (6:7) por a sosodé durante reino di Akaz; midí desonesto (6:10-11); mentira (6:12).

Un di dos proposito di Mikeas ta pa laga sa di Dios Su huisio ku ta bin komo resultado di nan piká. E buki ta demonstrá ku Mikeas a baloriá e santidat, rektitut i kompashon di Dios.

Su di tres proposito ta pa laga sa ku Dios lo restorá despues ku El a kastigá Su pueblo. Nos por resumí tur esaki bisando ku e mensahe prinsipal di Mikeas ta: Dios ta bai manda huisio pa motibu di e piká di Su pueblo, ma ainda E ta ofresé pordon i finalmente E lo restorá.

Un mensahe ku ta destaká den e buki ta: fe berdadero basá riba e rektitut di Dios soberano

lo produsí santidat personal i reformashon sosial. Tantu Juda komo Israel tabatin un religion di sho. Nan a kumpli ku ritonan i eksigensianan religioso ma no di kurason. Nos sa hasi meskos?

Un di e pikánan ku Mikeas a kondená tabata inhustisia pa ku pobernan di parti di e rikunan golos. Mikeas mes lo tabata di un famia pover i lo a mira e inhustisia aki djaserka. Pesei esaki lo tabata tantu riba su kurason.

Awendia tin hende ku ta yama nan mes kristian ku ta enfatisá esaki demasiado. Sin duda ta importante pa yuda pobernan i bringa kontra inhustisia. Santiago 1:27 ta laga sa ku fe ta algu praktiko. Ma di otro banda e “kristiannan” aki ta hasi e evangelio ku un mensahe sosial. Nan ta ta haña ku nan mensahe prinsipal mester ta liberashon pa pobernan i hende oprímí, kuminda pa esnan ku hamber, èts. Esei ta un parti di e siñansa di teologia di liberashon. Nos semper tin ku kòrda ku maske ta bon pa trata ku inhustisia i asuntonan sosial, nos mester ta kouteloso pa no laga e mensahe aki remplasá e evangelio puru!

V. STRUKTURA I KONTENIDO DI E BUKI

Méskos ku tur buki, por traha diferente skema di e buki di Mikeas. Algun ta haña ku e buki tin tres divishon, i ku kada divishon ta kuminsá ku e palabranan “tende” (1:2; 3:1; 6:1). Den e divishonnan aki por nota ku kada divishon ta inisiá ku akusashonnan i huisio pa motibu di piká (1:2-2:11; 3:1-12; 6:1-7:7). Tambe por nota ku kada divishon ta klousurá ku un promesa: promesa di liberashon (2:12-13), promesa di destrukshon di tera di e enemigunan (5:10,15) i promesa di kumpli ku Dios Su promesa ku El a hasi pa ku Abraham (7:20).

Ma nos lo hasi uso di e siguiente skema.

I. DIOS SU HUISIO TA PENDIENTE - 1-3

A. Dios Su Huisio Kontra Samaria i Jerusalèm - 1

Den 1:3-7, e destrukshon di Samaria, kapital di Israel, ta profetisá. Asiria tabata Dios Su hèrmènt pa kastigá Samaria. Mikeas a yora realisando ku huisio ta bin pa Jerusalèm tambe den 1:8-16. I esei a inkluí Juda en general. Mikeas a mensioná nòmber di diferente stat di Juda ku tabata situá den serkania unda el a biba (Gad, Safir, Lakis, Akzib, èts.)

B. Dios Su Kondenashon di e Lídernan - 2-3

Kapítulo dos a kondená sierto piká. Mikeas, probabelmente siendo di un famia pover, tabata sa ku rikunan a oprímí pobernan (2:1-2), ku tabatin hòrtamente for di turistanan (2:8), ku nan a saka biudanan for di nan kas (2:9). Dios a laga sa ku pasobra nan a plania maldat (2:1-2) pesei E ta plania algu malu pa nan (2:3-6).

Kapítulo tres a kondená sierto personanan: gobernantenan pa nan inhustisia (3:1-4), profetanan pasobra nan a pone hende dwal (3:5-8) i e gobernantenan atrobe pa nan inhustisia i korupshon (3:9-12). Lídernan mester guia e puebel den e direkshon ku nan mester bai. Ma si e lídernan ta hasi maldat, no por spera pa e puebel ta mihó! Bo no por guia otronan unda bo mes no a yega di bai. Si bo ta un líder—sea ta na trabou, na iglesia, na skol, òf na kas—sea un bon ehèmpel!

II. DIOS SU REINO TA PRIMINTI – 4-5

Mikeas i otro profetanan di Tèstament Bieu a pre-mirá e Mileño ku lo bin despues ku Dios a kastigá piká. Pero nan no tabata sa tur loke lo sosodé promé ku esei.

A. E Futuro Reino - 4:1-5:1

Mikeas klaramente a laga sa loke “lo sosodé den e último dianan” (4:1). El a mostra kon e reino futuro lo ta (4:1-8). Tambe el a profetisa ku Babilonia lo konkistá Juda, deportá su poblashon pa Babilonia, i despues e eksiliadonan hudiu na Babilonia lo regresá (4:9-5:1). Notabel ta ku tempu Mikeas a skirbi su buki, Asiria, no Babilonia tabata e nashon mas poderoso di mundu!

B. E Futuro Rei - 5:2-15

E sekshon aki ta kontené un profesia asombroso! Isaias a profetisá kon e Mesias lo bin (Isaias 7:14), nase di un birgen. Daniel a profetisá e tempu di Su binida (Daniel 9:24-27). Ma Mikeas (5:2) a profetisá e lugá di Su binida. Segun nos manera di pensa, e Mesias lo mester nase na un siudat prominente manera Roma, Atenas òf Jerusalèm. Ma Mikeas, un profeta pover, ta profetisá ku e Mesias lo nase na un pueblo umilde...Bètlehèm. E siguiete vèrsíkulonon (5:3-15) ta enfatisá e Rei bèrdadero i bon i Su Reino!

III. DIOS SU AKUSASHON I MISERIKORDIA – 6-7

Mikeas 6-7 ta skirbí manera un kombersashon entre Dios i Su puebel. Dios ta presentá Su kaso kontra Su pueblo. El ta lista Su bendishonnan pa ku Su puebel i ta roga nan pa repentí. Ma nan a bira lomba pE. Nan a lubidá ku El a libra nan for di Egipto, nan a lubidá adorashon di Dios, ma nan no a lubidá nan pikánan. Dios ta rabiá ku Su pueblo. Den 6:9-16, Dios ta papia mustra dikon e nashon ta sufri. I e buki ta klousurá (7:11-20) ku un profesia di bendishon den futuro pa pueblo di Dios.

VI. OPSERVASHONAN DI E BUKI

Pa hopi hende, Mikeas ta un di e profetanan menor favorito. Mikeas su manera di skirbi ta bunita. Su palabranan ta penetrante, ta tokábo. E buki ta demonstrá ku e profeta tabata un hòmber di sano huisio, realistiko, inteligente, i tambe personal, kariñoso i fiel.

Mikeas a skirbi ku stail di un reportero. El a hasi hopi pregunta (1:5; 2:7; 4:9; 6:3,7,10,11; 7:10,18). Mikeas tambe a hasi uso di kontraste (3:9-12; 4:1-5).

Ma tambe e buki di Mikeas ta kontené diferente pronóstiko. Pa un buki di tamayo di Mikeas, e buki ta sobresalí den e kantidat di profesianan ku a wòrdu kumpli.

PROFESIA	KUMPLIMENTU
1:6-7 - kaída di Samaria	722-721 B.C.
1:9-16 - invashon di Juda dor di Senekarib	702-701 B.C.
3:12; 7:13 - kaída di Jerusalèm	586 B.C.
4:10 - eksiliado na Babilon	586 B.C.
4:1-8,13; 7:11,14-17 – regreso despues di eksiliado	520 B.C.
5:2 - nasementu di Mesias na Bètlehèm	4 B.C.

Tambe ta interesante pa nota ku maske e buki ta chikitu, e ta sitá tres biaha pa otro outornan di Beibel. Den Jeremias 26:17-19 e ansianonan di Jerusalèm a referí na Mikas 3:12. Di bèrdat, e teksto aki di Mikeas a skapa bida di Jeremias. Ora rei Herodes a puntra unda e Mesias mester nase, e lídernan hudiu (Mateo 2:5-6) a respondé “Bètlehèm” a base di Mikeas 5:2. I Hesus (Mateo 10:35-36) a sita Mikeas 7:6 ora El a manda e diesdos apòstel pa prediká.

Talbes ta bon pa ripará ku e palabra “restante” ta bin dilanti diferente biaha den e buki (2:12; 4:7; 5:7,8; 7:18). Den 5:3, e palabra “restante” ta tradusí ku e palabranan “esnan ku a keda di”. Otro profeta tambe ta usa e palabra “restante”. Kiko esei ta nifiká? E ta referí na un grupito ku ta sobra for di hopi. Bes tras bes e profetanan ta laga sa ku maske e pueblo di Dios lo eksperensia Su kastigu pisá, semper E ta preservá un grupito for di nan tur.

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 330-332.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 187-194.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 114-115.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 101.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 390-394.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 431-436.
- McGee, J. Vernon, *Thru the Bible* notes, p. 283-284.
- Mears, Henrietta C., *What the Bible is All About* (Minneapolis: World Wide Publications, 1966), p. 303-309.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 117-121.
- Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).
- Wood, Leon J., *The Prophets of Israel* (Grand Rapids: Baker Book House, 1979), p. 309-312.